

Ian Spescha cuntinuescha

(fmr/sr) Il siemi il pli grond da Ian Spescha da Breil ei da daventar profi-entertainer. In pass en quella direcziun ha el fatg cun prender part a «Deutschland sucht den SuperStar». Culla canzun «Hush» da Deep Purple eisi gartegiau ad el da sequalificar per runda dus.

«Miu cor ha dau sin melli»

Ian Spescha da Breil a Razén ei el «Recall» da Deutschland sucht den SuperStar

SUSI ROTHMUND/FMR

Cun Ian Spescha separticipescha igl emprum Romontsch alla concorrenza da cantar «Deutschland sucht den SuperStar». Il mardis sera vargau ha igl emettur RTL mussau la runda da castings ed il giuven cantadur ch'ei oriunds da Breil ei sequalificaus per la proxima runda. Dapi sia affonza ei la musica in hobi ed ina caussa dil cor pil giuven da 24 onns che habitescha dapi in onn a Razén. Leu ei il dessignader tecnic da cuschinas per la gastronomia oravontut setschentaus ord motivs da professiun e di perquei: «Breil ei e resta mia patria dil cor.» Leu ha era siu plascher per la musica entschiet. Ils geniturs tedlavien bia musica, era da Deep Purple: «Jeu sun carschius si cun quella musica.»

Giuven talent

Enqualga persequitescha *Ian Spescha* l'emissiun Deutschland sucht den SuperStar (DSDS) alla televisiun ed enzacu ha ina conlvrera manegiau ch'el dueigi s'annunziar per la concorrenza da talents. Il giuven – che ha dacuort fundau ina band ensemen cun siu bab *Balzer Spescha* ed il frar *Sven Spescha* - ha tertgau «daco atgnamein buc?» ed ei s'annunziaus. Co lur band duei propi haver num, han ils Speschas aunc buca propi definiu. Tier lur repertori s'audan denton bia covers da Deep Purple ed era atgnas canzuns. Per saver ir al casting ha Ian Spescha giu da tarmetter in formular da selecziun, registraziuns da video e fotos. Allora ha el saviu separticipar a quater castings online e la finfinala ha el astgau ir en Tiaratudestga a sepresentar avon ina giuria da tschun personas. Leu ha el astgau sepresentar cun ses differents talents sco cantar, saltar ed era siu plascher d'imitar vuschs da prominents. Il pachet cumplet ha plaschiu ed aschia ha Ian Spescha saviu prender part a Koblenz nua ch'il casting ha giu liug per l'emprema ga sin in bastiment.

«Hush» dil 1968

Sut tschiel aviert ha il giuven cantadur astgau sepresentar avon la giuria cun *Dieter Bohlen*, *Mike Singer* e *Maite Kelly*. «Actualmein fetschel jeu musica plitost mo sco hobi ed aschia hai jeu giu grond respect da sepresentar avon quella giuria da prominents», conceda Ian Spescha

sin damonda dalla FMR ed aschunta: «Miu cor ha dau sin melli». Cun si'atgna versiun, respectivamein interpretaziun dalla canzun «Hush» da Deep Purple ha il giuven romontsch - ch'ei empau schenaus - mussau curascha. «Hush» ei numnadamein in hit dil 1968 e sco Bohlen ha criticau gia avon che Ian Spescha entscheivi a cantar - ina melodia brav curiosa pil temps dad oz. A generaziuns giuvnas ei il toc «Hush» era pauc enconuschents. Avon ch'ils candidats sepresentan san els eleger ina persuna dalla giuria sco joker e la vusch da quella quenta lu dublamein. Ian Spescha era sedecidius per Dieter Bohlen e quei ei stau siu cletg damai ch'el ha buca survegniu la vusch da Maite Kelly. Sia versiun dalla canzun da Deep Purple ha plaschiu ed era culs moviments da sault empau specials ha il simpatic giuven perschuadiu.

Cun «Übermorgen» el «Recall»

Ian Spescha ei pia sequalificaus pil «Recall» da DSDS e quell'emissiun ei gia registrada. Leu han ils candidats giu da sepresentar avon la giuria en gruppas da mintgamai diesch candidats. Mintgin ha giu a disposiziun ina minuta per sequalificar per las proximas emissiuns che vegnan allura emessas live. Quella ga ha il cantadur romontsch denton buca priu in hit da pli baul. El ei sepresentaus cun ina canzun moderna, numnadamein cun «Übermorgen» da *Mark Forster*. Ha quei tunschiu per vegnir vinavon? «Quei astgel jeu buca tradir ordavon», ei tut quei ch'el astga dir. Era cun cavar entuorn la buglia di Ian Spescha buca bia auter che: «Jeu sundel fetg cuntents sco igl ei iu.» El selegra era d'haver survegniu massa reacziuns sil casting, per gronda part positivas. Ei hagi duvrau uras per rispunder, mo aunc adina hagi el buca dumignau da scriver anavos a tut(ta)s. Sco Ian Spescha di s'auda il far musica e star sin tribuna tier sia veta, e siu siemi il pli grond fuss da daventar profi-entertainer. Sche lu eis ei da mirar DSDS per vegnir sissu sche quell'emissiun po dar in stausch a sia carriera.